

四庫全書

史部

欽定四庫全書

平定三逆方畧卷三十五

康熙十七年正月己卯總督金光祖奏復鬱林等
州縣

偽監軍道周遴元等拒守鬱林諸處將軍巡撫
傅宏烈理事官麻勒吉等招降之鬱林等一州
四縣悉復

庚辰

諭將軍莽依圖等廣西戰守事宜

先是莽依圖奏臣抵梧州聞吳三桂之孫世琮等來粵西桂林誘殺孫延齡據其城三桂率衆於十一月初六日來至衡州檄馬寶由宜章入粵西臣以梧州之間平樂最為要地非亟取不可因留總督金光祖駐梧州任轉輸防守之寄又遣兵駐潯州以禦柳州南寧之寇將軍巡撫傅宏烈於十二月十八日發自梧州臣於是月

二十日率師由封川趨賀縣會同宏烈進取平
樂未幾金光祖言逆賊馬雄死於維容柳州賊
心惶怖臣欲仍遵前

旨乘機進取橫州南寧以分賊勢率師于十二月二十
日自梧州啟行

上諭梧州兩粵之界又為將軍莽依圖等進兵後路頃
將軍巡撫傅宏烈自梧州率兵會莽依圖等由賀縣
進取平樂今總督金光祖復進取橫州南寧恐梧州

兵力單少莽依圖等身在地方情形緩急當所稔知
應戰應守熟計而行務期萬全且平定廣西蕩平雲
貴關係重要莽依圖等其同心協意共相圖度毋致
疎虞

趣將軍穆占進兵湖南

穆占奏聞吳逆自失茶陵攸縣諸處饋餉不給
軍士胥怨民多遠避但新復地方非堅守不可
臣惟俟安親王所遣滿兵及提督趙國祚抵茶

陵日即進取湖南韶州滿兵及平南親王下緣
旗兵何時由樂昌進取宜柳諸處知會到臣方
可相機前發若逆賊韓大任等逸入楚境江西
大兵宜追躡至湖南庶賊可撲滅新復地方亦
得無虞

上諭前命平南親王尚之信率兵赴韶州會將軍額楚
等由樂昌進宜章柳永其進兵可否尚之信等尚未
奏知穆占所領陝西荆岳諸處將士皆曾經簡擇平

定湖南惟此精兵是賴茲當逆賊窮蹙之時即宜乘勢速定湖南殄滅凶醜不可待尚之信等兵坐失機會至江西大兵現在徵討逆賊韓大任平賊之後自有措置豈可懸揣即行指示穆占亦不必待江西兵至湖南即鼓行滅賊亟靖疆場安親王亦宜速遣提督趙國祚赴茶陵其逆賊地方失守軍士胥怨民多遠避情形可移荆岳長沙大將軍王貝勒等知之命總督董衛國追勦韓大任等

衛國奏逆賊韓大任李懋珠陳堯元等敗竄永豐廬陵間復奔閬川洞白楊坳

上諭頃將軍舒恕言韓大任等敗走興國寶石砦已嚴勅護軍統領哈克三等速行追躡殲滅為期今大任等復竄去閬川洞白楊坳董衛國其疾往追勦務期撲滅

勅大將軍康親王傑書招撫民人依附海賊者

傑書疏言臣遣知府張仲舉等持諭往招海賊

鄭錦還報錦但云錢糧匱乏假託支吾語言無定觀此是海賊無降意矣

上諭鄭錦雖無降意其附逆人民有革心向化者大將軍康親王仍隨宜招撫

丙戌宥董重民等罪

偽總督董重民等自廣東解至京師

上諭大學士索額圖明珠曰逆賊吳三桂背恩倡亂其荼毒生民肆行逆惡罪在賊渠三桂與脅從之人無

涉彼所部人員如能悔罪投誠槩行寬免屢經有旨
今偽總督董重民自粵東執送宜即正刑誅但朕屢
經降旨寬宥且此輩原皆朕之臣子爾等會同兵刑
二部堂上官將董重民免死釋放同解罪人亦俱寬
釋併交與兵部俾各得所

戊戌

申諭各路大將軍王貝勒將軍大臣

上諭議政王等曰逆賊吳三桂等背恩倡亂荼毒生靈

擾亂疆宇朕念切除克志安民社仁育義正恩威並行大將軍等既承簡任當勵忠貞之誼早奏戡定之勲以副朕愛民至意乃自用兵以來大將軍王貝勒將軍大臣等固有盡心王事已著勞績者亦有觀望逗遛不思振旅邁進竟爾營私適已希圖便安或諉兵甲之不全或托舟楫之未具借端引日坐失事機者甚而干預公事挾制有司貪冒貨賄占踞利孔更有多方漁色購女隣疆顧戀私家信使絡繹尤可異

者新定地方亟需安輯乃於所在攘奪焚掠種種妄
行殊乖法紀本宜嚴察職名從重治罪但時當進勦
姑免處分策勵後効各路大將軍王貝勒將軍大臣
等各宜乘時速行進取恢復封疆振救民命一切違
法之事嚴加禁止倘有不遵許督撫指叅繩以重典
兵丁廝役犯者其將領家主均行連坐官員犯者除
本官重治外將帥分別議處地方官迎逢餽獻一併
嚴懲如督撫不糾或經言官劾奏或為被害首陳該

督撫以徇庇論督撫提鎮等官自違禁條加倍究治
其以此傳示內外嚴加曉諭俾一體遵行

臣謹按軍興以來

皇上念切生民所以戒諭諸將者屢矣但用兵之地遠
近各殊統兵之將賢否不一雖不無恪遵紀
律乃心王事之人而托故逗撓營私罔利擾
害百姓者亦自不乏彼其心以為身在疆隅
去京師遼遠即稍違法禁亦未必播聞殊不

知軍中進止一一難逃

睿鑒故若輩之情事

皇上早已洞悉復頒

諭旨申飭將帥併禁有司之餽遺懲督撫之徇隱訓誡

嚴明益見

聖主無日不以生民為念也

二月甲辰

命將軍額楚等赴梧州將軍覺羅舒恕守南雄諸處

總督金光祖自潯州進兵失利額楚以

聞

上諭金光祖不守梧州希圖立功輕進失利梧州不無
可虞萬一梧州失守則進取平桂大兵後路亦阻向
調將軍莽依圖等速赴梧州因平南親王尚之信不
亟發船至韶致誤軍行不可謂非王失機也梧州乃
兩廣接壤要地不可不增遣重兵駐韶將軍額楚都
統勒貝等即率兵前往戍防尚之信亦多遣精兵協

守駐贛將軍覺羅舒恕率兵往守南雄兼顧韶州大將軍簡親王量遣官兵與巡撫佟國禎總兵官哲勒肯等同守贛州

旨既下會將軍巡撫傅宏烈疏言吳逆悉其驍銳俱向廣西乞遣附近官兵星馳應援

上復命額楚等速赴廣西與將軍莽依圖傅宏烈等共籌攻守之策兩兵既合以莽依圖總統額楚勒貝參贊尚之信可親率將士速進廣西接濟大兵若之信

必難離會城宜多揀精銳速往應援額楚等兵既進
廣西將軍舒恕不必俟簡親王所遣之兵即率師迅
赴南雄已而之信奏臣臣奉

命進取宜章郴永行至清遠以總督金光祖及高州等
處報警遂還會城今潮陽諸處又報海賊突犯
臣所屬官兵有限不能分應

上諭潮州惠州既有將軍賴塔靖南王耿精忠提督王
可臣等鎮守勦禦海寇不為不足今將軍莽依圖等

深入廣西事機所繫甚重且廣西早定則湖南之寇
不能自存尚之信其以沿海地方付賴塔等親往接
濟廣西大兵毋悞軍事

命察還兩粵被掠人民

上諭兵部廣東賊變時被掠男婦子女可令平南親王
尚之信總督金光祖等嚴行察出令人民識視悉皆
發還俾其父子夫妻完聚粵西平日將軍莽依圖傳
宏烈等亦各察明被奪人口遣還原籍

欽定四庫全書

平定三邊方略
卷三十五

九

庚戌

命覈各路糧餉

上諭戶部積貯係國家大計年來各路兵馬需用糧餉浩繁在外總督巡撫及經管錢糧各官俱宜潔已奉公殫心稽察一應支放開銷務嚴加覈實節省方於軍國有裨近見各路奏銷或製備物料並不先行題明藉口軍機緊急濫請銷算或不行察核重複支給又不為扣抵或朦混重領希圖利己致滋糜費以及

侵欺浮冒種種弊端難以枚舉以後應作何禁飭處
分爾部會同吏兵工三部詳議具奏

調袁州總兵官趙應奎赴茶陵

先是大將軍安親王岳樂奏提督趙國祚奉調
茶陵理宜即遣但國祚所駐乃邊江要地日與
逆賊礮火相加實難遣赴而他處守兵又不可
撤今就近以守醴陵兵每佐領二人付署副都
統公沃赫率赴茶陵駐守已而將軍穆占奏茶

陵攸縣安仁永興鄴縣幅幘遼濶與賊逼近臣
等雖擊敗賊首郭應輔等而餘賊大半仍匿鄴
縣山谷中且吳三桂擁衆盤踞衡州江之東岸
有偽將軍馬寶等立營獨令沃赫控制諸地兵
力殊單

上諭穆占著俟簡親王至湖南日會同定議如協力同
進則量留簡親王兵守茶陵攸縣諸處若由他道而
行江西袁州已屬內地總兵官趙應奎可率標兵與

沃赫并力趙國祚仍留長沙今江西已平簡親王進
取湖南其江西綠旗官兵聽隨宜調用

甲寅

詔趣攻岳州

先是大將軍貝勒尚善言得鳥船四十艘可以
破賊因令江南造船如數送往後尚善復奏目
前水小難行俟三月後湖水既漲且添造之船
度亦告成爾時酌量水勢相幾進取

上諭湖中所須之船已如數辦遣尚善復若爾遷延觀其所奏雖添造船成又必旁借事端稽緩時日且公溫齊率往之兵本令勒賊非俾駐守荆岳也況添造之船難期三月必成時漸炎暑又逾進討之期大將軍順承郡王勒爾錦貝勒尚善等其公同確議添造船成可否擊破湖中賊艘具以奏聞尚善仍對如初勒爾錦言臣等因遠隔汎地船成之日能破湖賊與否未可遙度且水漲遲早難定臣等前疏曾

謂如有可乘之機則率兵渡江頃者荊州相對沿江一帶賊勢稍減臣請調將軍鄂鵬舟師并岳州沙唬船五十艘來荊州臣等即帥師渡江進取

上諭荊州滿漢兵數甚多攻守未為不足儻調鄂鵬兵船赴荊仍未能進取則往返稽遲反誤攻岳機會鄂鵬兵船不必調往俟船成之日即將溫齊所領及陝西調往之兵一併發赴岳州尚善等其詳加籌度務

期破賊

丙辰

命將軍賴塔等兼防廣東

上諭兵部頃平南親王尚之信言廣東潮陽諸處海洋賊艘不時出沒因令靖南王耿精忠將軍賴塔提督王可臣等鎮守潮惠濱海之地今既命之信或親往或遣兵隨宜應援廣西若遇廣東有警耿精忠賴塔等可即行勦禦并速移大將軍康親王知悉

己未

命大將軍公圖海等議留守陝西規取四川機宜

先是圖海奏當諸路勦賊之際亦宜進取漢中
興安但臣欲三路進兵而在秦之兵若留守諸
處要害則僅可進發一路請自京增遣大兵

上諭在陝滿兵為數不少將軍侯張勇將軍王進寶王
輔臣提督孫思克趙良棟總兵官高孟部兵猶多可
與張勇等公同詳議以聞已而圖海等奏臣等公議

以將軍席卜臣西安副都統翁愛陝西巡撫杭
愛領兵鎮守省城將軍畢力克圖副都統恰塔
領兵守隴州寶雞關山諸路內大臣侍衛坤巴
圖魯副都統馬一豹領兵守潼關甘肅巡撫鄂
善領標兵同副都統席第郎中拉篤祐等領蒙
古兵守秦州將軍侯張勇駐莊浪以防邊四川
巡撫張德地仍留延安鎮守延綏總兵官高孟
統標兵備棧道諸隘賊寇臣親率將軍佛尼勒

署副都統烏丹鄂克濟哈都統海爾圖西安副
都統穆成額副都統佟世德將軍王進寶王輔
臣陝西總督哈占以滿洲漢軍綠旗兵一萬三
千餘人為一路將軍阿密達率護軍統領傑殷
副都統覺和托夸岱四川總督周有德副都統
吳國禎署副都統張所養涼州提督孫思克漢
中總兵官費雅達以滿洲漢軍綠旗兵一萬三
千餘人為一路尅期前進提督趙良棟統標兵

繼大兵之後鎮守西和禮縣

上諭進勦逆賊固守秦中皆大將軍公圖海將軍侯張
勇將軍王進寶等是賴應作何留兵固守秦地使無
他虞作何進取漢興諸處規定四川圖海等協謀熟
計應機而行

乙丑韓大任赴福建降

先是護軍統領哈克三等大破賊於黃塘江御
嶺老虎洞鞍子嶺諸處賊勢窮蹙詣福建乞降

總督董衛國以

聞

上諭兵部韓大任等屢為護軍統領哈克三等所敗奔至汀州乞降于大將軍康親王康親王可速發兵往汀招大任等降攜駐福州仍酌量防守汀州若康親王未及招降大任等勢迫降於哈克三亦付康親王遣去之兵攜往福州至是大將軍簡親王喇布等奏大任等率偽官數百兵萬餘赴汀州投誠哈克

三等遣兵送往福州既至康親王傑書奏

聞

上命遣兵驛送大任等來京

辛未


命尚之信等簡發官兵赴廣西

時將軍莽依圖奏臣等抵平樂圍其城賊水陸
來援環攻將軍巡撫傅宏烈都統王國棟營綠
旗官兵與戰不勝營壘失陷河路皆為賊據道

阻糧匱孤軍難以久留因退至中山鎮此皆臣
才具庸劣不諳軍機致然法當重懲乞速罷臣
將軍職任以警衆宏烈亦奏損兵失壘臣罪誠
無可寬但滿漢官兵各自調度非臣所得指揮
臣標步軍零星分散難於前進倘益臣標兵專
臣平定廣西之責而以金光祖堅守潯梧後路
再令滿洲大兵或從韶州進湖南或仍駐肇慶
以壯聲援庶可濟事

上諭河水泛漲大兵不能相援賊衆我寡以致失利莽
依圖傳宏烈等皆著免罪宏烈既以兵少請濟師平
南親王尚之信可發精銳萬人多備火藥火礮速赴
廣西應援將軍賴塔會同靖南王耿精忠選藩下兵
千人并劉進忠標兵五千人付與都統馬九玉亦令
疾趨廣西從莽依圖傳宏烈等并力破賊莽依圖傳
宏烈以謀勇兼備並見倚任宜共相和洽同心協衷
謀濟國事滿漢軍士務令輯睦俟尚之信馬九玉等

兵及前調將軍額楚等兵至或一路進發或滿洲綠旗
兵二路進發公同詳酌定議以聞總督金光祖已留
官兵守潯身回梧州或即駐梧州接濟糧餉或莽依
圖等檄赴軍前並聽酌行



平定三逆方畧卷三十五

欽定四庫全書

史部

平定三逆方畧卷

三十六至四十

詳校官編修臣曹振鏞

編修臣裴謙覆勘

總校官候補中書臣潘有為

校對官中書臣李斯咏

謄錄監生臣邵廷曾

欽定四庫全書

平定三邊方略卷三十六

康熙十七年三月癸酉

勅大將軍康親王傑書增兵守漳州海澄

總督卽廷相奏海澄爲漳泉門戶今海逆登岸

據有玉洲等寨復分路侵犯石碼江東橋諸處

臣已同副都統瑚圖海澄公黃芳世公議酌發

滿漢官兵前往應援但漳屬地廣兵少防禦尚

恐難周

上諭海賊分路侵犯不可不亟發援師大將軍康親王
速增遣大兵與郎廷相黃芳世協力固守漳州海澄
諸處勦滅海寇

乙亥

命和碩額駙華善等赴茶陵

將軍穆占奏大將軍簡親王所遣護軍統領哈
克三等之兵來自長途馬多疲憊臣苟俟彼同

行又值炎暑若署副都統公沃赫總兵官趙應奎至日委以疆土即行前進則茶陵諸處曠濶兵力未足給守請先調江西兵內馬肥者每佐領二三人遣大臣一員率之速赴茶陵鎮守度簡親王兵必由茶陵進發臣等移兵候於耒陽郴州協謀以行

上諭哈克三等之兵長途馬憊不能疾馳穆占若俟彼同行愈稽進剿之期且茶陵諸處所係亦屬重要理

宜固守簡親王可就兵丁馬健堪用者每佐領選二人授和碩額駙華善定南將軍印與學士薩海領之速赴茶陵與沃赫等協同駐鎮哈克三等至吉安稍休士馬即繼簡親王進兵湖南共圖滅賊尋華善奏簡親王付臣每佐領兵二人但茶陵諸處止有沃赫一人其於分汛防守實為未足

上復諭之曰江西道省所係惟在茶陵大兵前進初無後繼將軍穆占簡親王等公同商酌選良將精兵留

之茶陵保固江西務俾萬無一失

戊寅

勅將軍莽依圖等守賀縣開建

上諭兵部頃以江西底定因命大將軍簡親王進取永
州寶慶遣將軍舒恕防守韶州南雄相機而行又令
平南親王尚之信發兵赴廣西調將軍額楚等自肇
慶赴梧州諸路並進滅寇恢疆正在今日總督金光
祖又稱賀縣開建乃粵東門戶最為要地守此二處

則兵餉可由封川運致今閱報文將軍莽依圖傳宏烈自平樂回軍儻莽依圖等還至肇慶德慶俾賊得據賀縣開建為死守計則復圖進取良屬不易梧州諸處將不可保即恐東粵亦至動搖莽依圖等宜固守賀縣開建諸處遇有機會可乘即行前進金光祖督運糧餉以給大軍毋致有悞

癸未

勅諭在外大小文武各官

上諭吏戶兵三部朕統御寰區孜孜圖治期於朝野安
恬民生樂業共享昇平乃副朕宵旰勵精之願不意
逆賊吳三桂背恩煽亂各處用兵禁旅徵勦供應浩
繁念及百姓困苦不忍加派科歛因允諸臣節次條
奏如裁減驛站官俸工食及存留各項錢糧改折漕
白二糧顏料各物增添鹽課鹽丁房田稅契牙行雜
稅官戶田地錢糧奏銷浮冒隱漏地畝嚴行定例處
分用過軍需未經報部不准銷算以上新定則例不

無過嚴但為籌畫軍需早滅逆賊以安百姓之故事
平之日自有裁酌各省督撫提鎮大小文武等官俱
宜上體朕意下念民生絜已奉公愛惜物力務期早
奏蕩平與民休息以稱朕又安海宇至意

命尚之信仍駐廣東會城

之信奏前有

旨命臣親統官兵進廣西臣慮逆賊窺我兵已撤必肆
潯梧且高雷廉三郡初定人心尚未寧戢恐復

為逆賊煽惑再四熟籌不得不駐鎮省會以圖
四應

上諭尚之信藩下兵著精選萬人遣赴廣西停其親往
仍鎮守廣東省會兼顧潮惠勿致疎虞

甲申

命大將軍貝勒尚善圖功贖罪

先是

上諭議政王等岳州前後船艘多於賊數倍合此船破

敵何難之有乃尚善統兵駐岳州已經數年未一大
創賊寇今大將軍安親王分兵既克平江江西湖廣
道路已通侯公溫齊等兵及自陝西調往之兵抵岳
州日尚善可率所部大臣及每佐領兵五人赴長沙
駐守令安親王率所部大臣選每佐領兵五人來取
岳州進攻岳州時應遣將軍鄂爾率舟師前進陸地
則令滿漢官兵實土蘆固排列鹿角進逼賊壘晝夜
火攻俾賊水陸應援不暇江之南岸石首縣城即宜

攻取令水陸兵連營江岸或另立一營扼湖之險更
於南潯港地方水陸立營斷賊後路安親王總統官
兵相機勦援庶為有濟不必令舟師往泊君山無用
之地若準此而行斷賊餉道朕意以為必能克取岳
州至是尚善奏言臣等數年與賊對壘並無寸效仰
慰

聖懷今臣等仍願統率舟師務克岳州以贖前罪
上諭尚善等願率舟師自效可仍留岳州務痛懲前非

滅賊收疆勉圖贖罪

詔大將軍康親王傑書罷遣廣東援兵

傑書奏前令臣發兵守潮州今海逆侵犯海澄
諸處大兵僅足支持無兵可遣

上諭平南親王尚之信已停赴廣西見令兼顧潮惠而
靖南王耿精忠將軍賴塔仍鎮守潮惠諸處大將軍
康親王其速遣官兵勦滅侵犯海澄賊寇不必應援
廣東

乙酉

勅大將軍簡親王喇布與將軍穆占合兵進定湖南

先是

上諭議政王等曰韓大任等既抵福州其江西追勦官兵度已回汎大將軍簡親王宜乘此機會統率大兵亟勦湖南逆賊一應機宜可與將軍穆占定議或并力會勦或分道進發相機速行一面奏報至是穆占奏請令簡親王兵與其所部兵會合一路自茶

陵取郴州耒陽諸處即自永州渡江直向衡州
上命簡親王整頓軍馬速與穆占會合詳加籌畫令江
西萬無他虞保固茶陵諸處及大將軍安親王後路
然後會師一路進發平定湖南其護軍統領哈克三
等追勦韓逆直抵福建軍士馬匹羸乏可將現在南
昌馬一千解至簡親王軍前均給缺馬軍士

丙戌

諭大將軍公圖海罷漢中興安進兵

上諭圖海曰卿前疏言秦地遼濶留守兵單今當進取漢中興安之期度果萬無一失有收復之機仍行進取但秦地所繫重大卿等親率大兵前進而王進寶孫思克等倚任諸臣俱在戎行脫行後更有他虞殊難過禦宜暫停漢興之役固守所在要害廣布恩威從事招撫俟後有可取之機再行聞奏其謹閱之

命將軍莽吉圖守梧州

上諭議政王等曰今逆賊侵犯潯州諸處梧州高州所

關最要將軍莽依圖可駐鎮梧州若遇高州諸處有警即行應援將軍巡撫傅宏烈整頓士馬俟進兵平樂桂林與將軍額楚都統勒貝署副都統穆成額同行如兵力未足許於莽依圖等兵內量調前進既復諭議政王等曰自逆賊吳三桂叛變以來大兵諸路徵勦平南親王尚之信歸正之時將軍巡撫傅宏烈思念國恩密約反正所領官兵從未支領俸餉輒奮勇入粵西收復梧州諸處殲戮渠帥屢奏捷功嗣以進

取平桂規定滇黔奏乞迅發大兵以相助援因遣將
軍莽依圖等協力恢復平桂本期莽依圖等與傅宏
烈并力平定廣西克濟大事不意莽依圖等兵抵平
樂寸步不前藉口綠旗營壘失陷遽奔還中山鎮仍
復畏縮退至賀縣又託言糧餉不繼徑回梧州德慶
以傅宏烈恢復如許城池盡棄與賊今若梧州乏糧
必將退回肇慶肇慶乏糧必將退至廣州苟廣州乏
糧當復棄廣州而還耶如此怯懦多端推諉不惟悞

西徵之事即粵東恐亦可虞頃有旨令莽依圖駐鎮梧州兼顧高州諸處嗣今宜痛改前轍鼓舞軍士勉圖後效相機勦賊底定封疆爾等嚴行申飭

臣謹按大兵自粵東進勦雲南必取道粵西前者傳宏烈率部衆西徵疏請濟師

皇上念平定粵西所關重要宏烈孤軍或難集事已亟命莽依圖等合軍進勦是誠蕩平一大機會也當莽依圖等抵平樂敗賊之後即奮力環攻其城則

平樂必下我師可以徑達桂林矣不謂攻城
少緩俾逆賊吳世琮得統衆來援龔破宏烈
等軍莽依圖復不能整兵擊賊藉口綠旗失
利遽爾引退及至賀縣又託言糧餉不繼竟
還德慶致潯州諸地仍為賊有祖澤清復叛
於高州粵東因之騷動幸賴

廟筭增調官兵迅討叛寇扼守要害使逆賊不得鷄張
澤清旋即就縛而粵東無虞粵西亦相機底

定大兵遂長驅而進直搗滇中蓋

聖明調度悉合機宜所以行間諸將能稟承者克奏捷
功稍有稽違則必致失利也

詔廣東協濟廣西兵餉

將軍巡撫傅宏烈奏粵西地方今僅存梧州一
府滿漢兵馬芻糗浩繁力難供應

上諭大兵糧餉關係殊急不可但取給廣西宜令廣東
協濟平南親王尚之信可支餉銀二十萬兩解赴廣

西并令廣東督撫運致糧草俾無悞軍需

癸巳

命大將軍貝勒尚善招撫杜輝

尚之信奏偽水師將軍杜輝之子杜國臣向在

廣東臣於本月初六日遣人送赴岳州

上諭杜輝原係雲南永北總兵官儻思念國恩傾心歸
正於事甚有裨益杜國臣抵岳州日大將軍貝勒選
賢能人員密遣至輝所曉以伊子來岳招令反正或

杜輝實心歸化潛約何地乞遣其子或畏遣子泄漏
答以他言貝勒應審察情狀若國臣可遣度萬無可
慮則遣之務俾有濟大事如稍有可疑切勿輕畀俟
有機會布朕德意移書招致爾宜加意慎秘勿使宣
洩

遣詹事宜昌阿赴岳州

上諭兵部遣詹事宜昌阿前赴岳州與大將軍貝勒尚
善會議隨宜招降杜輝並視大兵擊賊情形

庚子

命總督蔡毓榮率兵赴岳州

大將軍貝勒尚善奏岳州原有鳥船又奉

旨添造者一百艘沙船四百三十八艘官兵自陸路分

布外餘滿洲蒙古漢軍配鳥船八十艘沙船一

百七十三艘綠旗配鳥船二十艘沙船一百二

十二艘猶餘沙船一百四十三艘須用綠旗兵

五千人臣等茲復入湖務期破賊乞如數調發

上諭公溫齊等率往所調陝西滿漢兵以及船數乃尚
善所備知宜早為通計如有不足預當奏請令各路
赴調之兵俱抵岳州船艚營造已竟乃始奏請增兵
殊屬不合但尚善等既稱茲役入湖務期破賊其令
蔡毓榮率標兵三千并荊州隨徵綠旗兵二千馳赴
岳州與尚善協力擊破湖賊攻取岳州如荊州彝陵
防禦兵少大將軍順承郡王參贊大臣總督蔡毓榮
公同酌調附近綠旗兵遣發汛守

閏三月辛丑朔

勅理事官麻勒吉等招撫馬雄孫延齡餘黨

大將軍簡親王喇布奏麻勒吉等抵吉安稱孫延齡為吳三桂所殺馬雄病死

上諭馬雄孫延齡雖經死亡其餘黨尚踞粵西理事官麻勒吉等仍同簡親王軍偕行以朕赦罪諭功之意
梁行曉示其被脅從賊之人有悔罪投誠者即行招撫

癸丑

命尚之信等討祖澤清

廣東肇慶安塘司庫報三月二十二日高雷總兵官祖澤清復叛二十四日提督王可臣病故上諭祖澤清先經反叛及投誠之後隨加寬宥仍授總兵旋擢鑾儀使今復背恩反叛兇惡已極宜即行誅滅以懲奸類平南親王尚之信將軍莽依圖額楚傳宏烈總督金光祖等其會同商酌速行盪滅至廣東

提督職任綦重王可臣既已病故管理不可乏人其
令總兵官侯襲爵暫理提督事務與大兵協力討賊

丙辰

命遷邊海界外居民於內地

上諭議政王等曰海寇盤踞廈門諸處勾連山賊煽亂
地方皆由閩地瀕海居民為之藉也應如順治十八
年立界之例將界外居民遷移內地仍申嚴海禁絕
其交通但窮苦之民一旦遷徙必棄其田舍難以為

生殊可憫惻可將本年地丁錢糧差徭雜項盡行除
豁該督撫揀委能員遷徙人民勿致苦累仍俾安輯
得所

丁巳授將軍穆占進兵機宜

穆占奏言接大將軍安親王檄稱湘潭偽將軍
林興珠遣人約降大兵方渡江駐湘潭以圖進
取臣若俟簡親王至日方行恐失機會今議以
南昌所屬付總督董衛國贛州南安付將軍舒

恕令之駐守而留每佐領兵二人於吉安令副都統一人領之防守太和萬安諸處又留滿兵三百人於永新亦令副都統一人領之勦禦郭應輔等賊兼顧茶陵後路又令袁州副都統席布率每佐領兵二人鎮守袁瑞臨江諸郡兼顧安親王後路廣信尚有餘賊令總兵官許貞領標兵二千駐守其總兵官高登科標兵一千贛州綠旗兵二千俱聽簡親王統率前進簡親王

抵茶陵日留所部才能大臣精銳官兵之半其餘簡親王率之仍遵前

旨從臣兵所由之路進定湖南至攸縣最為要地已留

臣所部前鋒統領希福率副都統公沃赫之兵

與將軍華善協同鎮守攸縣安仁諸處兼顧江

西臣於本月十二日自茶陵啟行進取耒陽郴

州桂東桂陽

上諭將軍舒恕見鎮南雄韶州諸處不便更令移駐南

贛其令巡撫佟國禎總兵官哲勒肯固守南贛餘如
穆占所請當此逆賊震動之際穆占急宜進兵郴州
耒陽以分賊勢耒陽諸處克復即於上游渡江斷賊
歸路與安親王協勦賊寇如江未可渡則為渡江之
形畧定沿江北岸地方以張安親王大軍聲勢

詔責將軍莽依圖

莽依圖奏所部滿洲蒙古兵馬多疲甲冑朽敝
上諭莽依圖赴廣西不能奮力破賊亟行退却前既藉

口糧匱今又以兵無馬甲託詞具奏殊辜委任且以莽依圖退縮之故賊勢益張致廣東震動祖逆復叛宜即嚴加治罪但時方用兵高州暫緩處分俟旋師日察議既而莽依圖以失利退兵致地方失陷自陳請罪乞罷將軍任

上復切責之曰莽依圖至平樂不能殲寇拓疆擅自退還致潯州諸處陷賊今乃云彼未至梧州傳宏烈金光祖早已棄地明諉過於宏烈而託以認罪為辭巧

飾妄奏殊屬不合宜立行處分但見在行間其仍留將軍任圖功贖罪

已未

遣郎中拉篤祜如涼州

先是

上諭兵部自席喇塔喇至瑚呼諾爾道路甚近此蒙古中情形及其地方朕皆悉知可令郎中拉篤祜馳驛來京面承密旨尋

諭大學等令拉篤祜赴涼州探厄魯特部落台吉噶爾丹信息不時以報至是拉篤祜來京請攜將軍侯張勇標員一人同往涼州

上許之

庚申趣大將軍貝勒尚善進兵

上諭兵部據將軍穆占奏偽將軍林興珠赴大將軍安親王軍前投誠逆賊俱無固志岳州長沙相距頗近貝勒尚善必已聞知前尚善等疏稱俟添造鳥船沙

船皆至前破湖賊今方逆賊震讐之時若有隙可乘
不必俟船齊備即以現在船艦進攻仍錄穆占所奏
示尚善及順承郡王知之

丙寅

命南汝總兵官周邦寧率兵赴荊州

先是大將軍順承郡王勒爾錦奏前

旨令總督蔡毓榮率兵五千赴岳州但彼標兵自荊州
以至彝陵諸路俱設汛防而大江賊船不時出

沒滋陽逆賊復渡江置壘若毓榮率兵赴岳則
荊州諸處不無可虞

上諭攻取岳州事機重大且大將軍貝勒尚善既稱茲
役進湖必期破賊蔡毓榮之兵不可不遣順承郡王
仍遵前旨行荊州兵既未足可令河南南汝總兵官
周邦寧率標兵一千五百人赴襄陽既至順承郡王
等量調襄陽總兵官劉成龍標兵赴荊防禦未幾勒
爾錦復奏劉成龍標下及援勦兵俱應留守各汛

上諭劉成龍標兵既與地方相習可仍留襄陽周邦寧率兵徑赴荊州巡撫張朝珍於武昌諸處兵內調足二千代援勦兵與蔡毓榮偕往其援勦兵仍留荊州

丁卯授林興珠為建義將軍封侯爵

大將軍安親王岳樂奏三月二十八日夜偽親軍水師右翼將軍林興珠自湘潭遣偽官楊廷言等詣臣軍前投致降啟隨遣副都統幹都海阿進泰以兵往迎又遣叅領沙納哈率兵收取

彼處船礮至林興珠部下官兵潰散幹都海阿進泰不守湘潭又不遣人請臣指示見獲之船竟盡行焚燬於本月初四日率領林興珠來至軍前及沙納哈還亦並無船艦收獲

上諭林興珠不忘國恩率其所屬人員傾心歸正深為可嘉其從優封侯爵授建義將軍楊廷言等往來奔走開導曉諭亦與議叙若輩妻子該督撫安插撫卹務令得所幹都海阿進泰不守湘潭反擅燬已獲船

艦急於退回致逆賊得據要害貽誤緊要軍機情罪殊為可惡著革職逮至江西南昌收繫安親王岳樂明知湘潭關係最要不選擇賢能大臣遣往乃用幹都海等庸懦之徒以致誤事殊屬不合著飭行林興珠可留安親王軍前勦撫賊黨

已已

命大將軍簡親王喇布鎮守茶陵護軍統領哈克三率兵赴湖南

將軍華善奏茶陵為江西門戶重地將軍穆占留兵甚少恐吳逆乘間自衡州出犯安仁攸縣諸處請增發大兵為防禦計

上諭茶陵攸縣關係江西全省將軍穆占因聞安親王渡江故率兵深入乃安親王實未渡江儻逆賊間道來侵江省可慮簡親王其率將軍華善前鋒統領希福學士薩海等共商鎮守茶陵諸處以兵付護軍統領哈克三由穆占進兵之路急行追及并力破賊穆

占軍前聲息及逆賊情形簡親王不時奏報

平定三逆方畧卷三十六

欽定四庫全書

平定三逆方畧卷三十七

康熙十七年四月庚午朔調副都統雅塔里率兵
赴福建

漳州安塘筆帖式報副都統伯穆赫林海澄公
黃芳世等師次灣腰樹為賊所衝平和失陷賊
逼潮州而營

上諭大將軍康親王兵既分援諸路蒙古兵復撤回閩

中兵力似屬未足今浙江平靖可於杭台衢三府滿
洲蒙古漢軍兵內選六百人令雅塔里率赴福建聽
康親王調遣據報賊逼潮州而營應檄將軍拉哈達
賴塔靖南王耿精忠等交相計議勦滅漳潮間賊寇
已卯

命將軍穆占調兵防守郴州宜章諸處

穆占奏官兵恢復郴州桂陽興寧宜章諸處其
地為通粵要路幅輳遼濶不可不駐兵防守欲

留臣等之兵即恐進戰兵力單弱苟不設防則
新復之地又復可虞乞別調官兵駐守

上諭頃因茶陵攸縣地屬要區已勅大將軍簡親王不
必繼穆占前進與和碩額駙華善協同鎮守仍令護
軍統領哈克三等會同穆占併力進剿今穆占既恢
復柳宜諸處當增兵防守若粵東無虞鎮守南韶將
軍舒恕之兵可調往駐防若粵東可慮則勿調舒恕
兵或應於簡親王兵內通融分撥或量留哈克三兵

增防並聽穆占斟酌以行

尋穆占招撫偽總兵王育等收復臨武藍山嘉
禾桂陽桂東五縣因奏言臣以兵抵永興渡河
進勦檄將軍華善遣兵永興以續我師之後華
善謂茶陵諸處留兵甚少不為遣兵臣因將郴
州永興桂陽興寧諸處令都統伊里布前鋒統
領碩岱護軍統領拉賽副都統託岱祖澤純宜
孝思等率兵分汛防守但新復地方幅幘遼濶

不可不增兵駐鎮茶陵有滿兵每佐領四人及
總兵官趙應奎與臣等所留湖廣綠旗兵又留
簡親王兵一半為數不少請於此兵內遣往柳
桂永興諸處以資防守

上諭頃有旨將軍舒恕之兵應否調守柳州諸處或酌
分簡親王之兵或應留護軍統領哈克三之兵聽穆
占酌行今穆占身在地方相視緩急作何調兵防守
柳州諸處仍遵前旨相機從事

庚辰遣部員分理進粵大兵糧餉

先是因廣東糧闕進勅粵西大兵饋運難繼

上命撥江西銀十萬兩安徽銀十五萬兩由江西採購
米穀運送廣東至是總督董衛國奏言江西地
方殘弊之後購米未可即得

上諭該督奏稱江西經賊殘破購米艱難前撥安徽銀
十五萬兩宜就近付江南督撫採辦陸續送至江西
轉運粵東但輸輓軍糧所關最重可令戶部郎中吳

什巴員外郎莫洛馳驛赴江西廣東隨宜區畫毋困民力毋誤軍需

甲戌增設福建總督及海澄公標下官兵

時海澄公黃芳世奏閩省變亂時臣叔梧弟芳度所部官兵並已離散臣抵漳之後頗復收集請減兵額為三千付臣弟芳泰統轄總督即廷相又奏海逆勢焰日盛勾連山賊互相應援臣標兵止二千五百所在告警不能分應請增

臣

標兵二千五百設立五營今韓大任投誠之兵
見在給糧卽以此兵補入臣標可不煩別糜糧

餉

上諭海澄公黃芳世收集之兵往時遭亂奮志堅守孤
城効力勞苦今逆氛未靖不當令其分散宜如所請
以三千人隸籍給餉黃芳泰已授京口左路總兵官
其令黃芳世標員分轄此兵總督卽廷相奏增兵二
千五百設五營亦如所請但韓大任之兵新經招撫

不宜聚處一軍大將軍康親王及參贊大臣將軍耿
昭忠及該督撫提等詳議以撫提標舊兵與新附之
衆相參配合以足兵額統轄官員該督選擇題補
趣將軍額楚等勦滅叛賊祖澤清

時祖澤清自高州勾連山海諸寇水陸交犯電
白

上諭逆賊祖澤清背叛已調平南王尚之信副都統額
赫訥等率兵進勦復遣將軍傅宏烈都統勒貝等率

兵攻取鬱林諸處今賊來侵至於電白尚之信將軍
額楚等其速行攻勦撲滅

戊子

命遣隨降兵衆歸雲南

上諭兵部吳三桂背恩倡叛彼所部人員向沐國恩甚
久其中不無被脅者韓大任等既經投誠該部仍議
叙加恩外其同來護軍甲兵皆國家素所養之人
若輩父母妻子俱陷賊中可發遣令歸滇中俾得完

聚其續至者兵部逐一問明或有願歸奏聞并發

庚寅趣大將軍康親王傑書等援海澄

時漳州安塘筆帖式報海逆水陸環圍海澄我
兵失利於灣腰樹賊勢益張堅守海澄道路乘
船肆擾聞海澄城中糧已匱乏而賊復日犯漳
州總督郎廷相復奏海賊猖獗而閩省兵單請
調江南浙江廣東三省滿漢官兵赴援漳泉又
請調三省水師戰艦并於福建召募水卒規取

廈門

上諭江南舟師調發岳州諸處京口亦為濱海要地廣東之兵進勦祖逆鎮守潮州官兵及劉進忠所部官兵又調往廣西梧州署副都統孟安等已率兵往援漳州副都統雅塔里亦已率浙江大兵前赴福建此三省之兵已隨在分遣不可復行調發且目下事機援海澄為急郎廷相乃奏請調募舟師規取廈門不合俱不准行大將軍康親王等身受全閩重寄宜將

雅塔里率往之兵并黃芳世郎廷相標下增設之兵
隨宜調遣務亟解海澄之圍撲滅犯漳賊寇

乙未

命將軍侯張勇移鎮甘州

張勇奏吳逆饋遺諸達賴台吉交相連結彝人
受其誘惑益肆窺伺蓄意欲圖入掠且逆賊已
知松潘茂州番中有通西寧大路恐潛乘間隙
侵茶馬之利

上諭甘州肅州涼州三處為邊陲要地往時特令提督
駐鎮甘州後因川賊侵犯秦州河東多事故移張勇
於蘭州今逆賊吳三桂交通彝人圖擾邊境不可不
加固守張勇久任邊鎮素著威名彝人懾服其仍移
鎮甘州調度防禦進邊彝人相機遣出如有不遵約
束恣意妄行嚴加隄備一面與大將軍公圖海等籌
畫酌便而行

五月庚子朔授大將軍貝勒尚善等進取機宜

先是

上諭兵部一等護衛雅圖侍讀學士格爾古德來自長沙奏言投誠偽將軍林興珠向安親王言前岳州舟師再戰興珠皆在今我船甚多宜分其半泊君山以斷常德之道餘船泊香爐峽扁山布袋口諸處沿九貴山陸路立營以斷長沙衡州之道則岳州賊路阻塞縱有糧米而薪芻器用必致乏絕賊可不戰而斃矣王令以此奏聞可即移文詹事宜昌阿知之

至是宜昌阿奏我兵進湖後於高家廟君山扁
山九貴山九馬嘴諸處聯落泊舟以斷賊路九
貴山復設陸營使水陸相望我船相去不遠縱
岳州賊出犯可以并力攻擊即長沙衡州常德
諸賊來援亦可合勢勦禦賊內外阻絕勢必窮
蹙如得岳州後宜進取何地彼時方行請

旨必致後期當如何進兵乞預示機宜

上諭宜昌阿所奏水陸大兵進攻岳州貝勒尚善等宜

熟計萬全以期速克既克之後即乘勢速取常德澧
州諸處勿令賊得為備尚善等前以所在逗留貽誤
大事今宜殫心竭力勉圖自效毋得仍蹈前轍玩日
稽時

命發京師兵赴福建更戍

上諭兵部進討福建官兵勞苦日久今撥每佐領護軍
一人甲兵二人前往代戍署副都統岳爾多己自福
建率蒙古兵來京即令統轄前往

調將軍賴塔等率師援海澄

大將軍康親王傑書奏海澄危急臣已檄駐守
廣東潮州將軍賴塔率所部兵之半及綠旗兵
來援餘兵令副都統沃伸巴圖魯統領同靖南
王耿精忠駐守潮州

上諭海澄被圍日久勢在危急將軍賴塔可率兵速往
救援潮州亦屬要地康親王更檄沃伸巴圖魯等嚴
加固守但海逆勢甚猖獗不可不增發官兵浙江既

有將軍總督巡撫總兵官足以固圉應選綠旗精兵
三千令提督石調聲統之速往應援如或稽遲從重
治罪

命總兵官黃芳泰襲封海澄公

先是海澄公黃芳世病篤上疏言臣叔梧弟芳
度全家殉難不遺一孤臣止一男甫及九歲臣
弟總兵官芳泰久歷戎行備嘗險阻乞令承襲
公爵已而芳世病故總督卽延相以

聞

上命贈芳世少保以總兵官黃芳泰襲封海澄公

癸卯卹出征兵士物故者

上諭兵部各路出征兵士有奮勇陣亡者有不習水土
病故者此屬皆累朝効力盡瘁殞身殊可憫惻今其
骸骨相繼而還念彼兵士悉皆貧苦應得卹銀宜行
早給俾克殯葬爾部察明隨到即行奏發以副朕軫
卹士卒至意

己酉

命調江寧提督楊捷為福建提督

先是

上諭吏兵二部向以閩省海疆要地雖經恢復海逆未
平民生凋敝撫綏防禦惟在文武大吏相與殫心料
理方于兵民有裨今總督郎廷相提督段應舉自簡
任以來為時已久山谷之伏莽未靖閭閻之困苦未
蘇吏治未見澄清營伍漫無整頓寇警頻聞地方躡

擾更有甚者海賊侵犯內地事前不能預防事後不能勦禦皆由該總督提督庸懦無才職業不修所致殊負簡任之意豈可仍令在任貽誤封疆大將軍康親王參贊大臣等其會同嚴加確議密行具奏至是康親王傑書等奏郎廷相等應嚴加處分

上諭郎廷相段應舉俱著解任吏兵二部嚴加議處江寧提督楊捷謀勇兼優威望素著歷任巖疆兵民感戴効力有年克稱厥職前以江南重地彈壓需人特

簡賢能用資料理通者江南地方寧謐著有成效今
閩省海氛未靖正在用兵必得偉畧奇材方克掃蕩
鯨鯢底定疆圉楊捷著以原銜加少保兼太子太保
調補福建全省水陸提督總兵官一切勦禦賊寇保
固地方戰守機宜全資殫心籌畫展布壯猷以副朕
簡擢倚任至意

庚戌

詔議叙喀喇沁土默特部落塔布囊善達等

時署副都統岳爾多率出征福建蒙古兵還京
上諭兵部理藩院曰喀喇沁土默特部落塔布囊善達
台吉察渾塔布囊霍濟格爾等奉調往浙聽大將軍
康親王調度各統所屬官兵徵勦逆賊後深入閩省
同大兵平定地方行間効力身先士卒衝鋒陷陣奮
勇用命深為可嘉宜降恩綸即行議叙以勵後効爾
部院會同速行議叙具奏

乙丑尚之信奏復高州雷州

之信及副都統額赫訥等於四月十一日抵電
白大敗賊衆越六日克其城祖澤清聞之宵遁
十九日恢復高州尋遣人招降雷州

平定三逆方畧卷三十七

欽定四庫全書

平定三逆方畧卷三十八

康熙十七年六月庚午朔

詔責大將軍康親王傑書

上諭議政王等曰康親王傑書用兵甚為選愼自至浙江安居無事之地及屢降嚴旨督趣始破衢州之賊進定福建福建既平不事預防固守俾海賊登岸遂困海澄況我朝軍法賞罰最嚴且明無敢苟且輕忽

浙江福建失機將士傑書未嘗察取供詞優柔庸懦不能嚴明賞罰預防海逆恣令登岸均屬不合其集議以聞既而議政王等奏言傑書罷庸已甚急忽軍紀宜并參贊大臣嚴行處分但見在出征俟師旋察議海澄危急且令盡力救援

上許之

敕駐守潮州官兵援海澄尚之信帥師駐潮州

上諭議政王等曰福建之兵汛守沿海訖於潮州勢分

力弱而解海澄之急又屬最要頃平南王尚之信已
擊敗高州逆賊令其速還會城即率兵馳赴潮州鎮
守其在潮州滿兵及靖南王并其所屬官兵令赴將
軍賴塔拉哈達所併力勦賊以援海澄如尚之信不
能親行則速遣官兵至潮同總兵官馬三奇防守
癸酉蠲浙江江山西安諸處逋賦

上諭戶部浙江江山等十五縣及西安等四縣溫衢各
衛所逼近閩中首先被陷百姓困苦其康熙十六年

以前錢糧概從蠲豁并令該督撫多方招徠逃避山谷殘黎各還故土俾事耕墾

己卯

勅將軍莽依圖等規定廣西

先是將軍巡撫傅宏烈欲進兵南寧以向田州
泗城後將軍莽依圖謂竟入南寧非策宜令將
軍額楚取平樂桂林宏烈取南寧兩路齊舉

上諭向因規定廣西調遣滿漢官兵甚多今進徵田州

泗城若待他路諸軍齊舉必稽時日苟為不待則一
旅孤軍似難有濟平粵事宜所關鉅要不可忽易將
軍莽依圖額楚傳宏烈及參贊諸臣與總督金光祖
等俟克復潯州俱赴梧州面議宜何路前進先取何
地相與協志和衷詳加定畫務期有益國家勿圖自
便

甲申

命尚之信遣兵防守宜章

將軍穆占奏偽將軍胡國柱致書於柳宜參將
陳武亨武亨不敢發函羈執賊使自首訊知桂
東桂陽降將于賢何興所賊亦致書恐彼等為
賊所煽惑

上諭將軍穆占所守地方遼濶而永興見被賊侵儻桂
東桂陽降將于賢輩復為賊所煽惑則疆圉深屬可
虞宜章地處最要若駐兵防守其間西可以固臨武
藍山嘉禾而東至桂東桂陽降人不致搖動宜令平

南親王尚之信速調鎮守韶州綠旗官兵馳赴宜章
固守參將陳武亨出首逆書忠誠可嘉該部議叙以
聞

丁亥

勅諭大將軍簡親王喇布將軍穆占共相輯睦

先是喇布奏茶陵攸縣安仁諸處實為江西咽喉
且與賊密通將軍穆占啟臣謂前所遣援兵
尚少更須增發如逆賊分路出犯則大兵之路

被賊阻塞而江省亦甚可虞且永興介在茶陵
安仁郴州桂陽之間急宜擊却永興之賊不當
撤兵還郴請

勅穆占先勦滅此賊穆占因奏曰自寇侵永興臣遣駐
防郴州護軍統領哈克三拉賽前鋒統領碩岱
等領滿洲蒙古漢軍綠旗兵陸續往援並無撤
兵還郴之事如果撤兵則署副都統雅秦所豈
無臣印信文書此皆妄奏耳且簡親王疏云請

勅臣先滅永興之賊是簡親王知臣不為

皇上盡心而請耶抑知臣之盡心故不樂而為此奏耶臣
所在勦賊恢復疆土

皇上亦所洞鑒但郴州甚要臣未便輕離若遣一良將
來守郴州諸處俾臣率兵討永興之寇或進取
耒陽必能成功

上諭將軍穆占既言郴州甚要必難輕離穆占可駐守
郴州酌調官兵撲勦逆賊穆占既未撤兵還郴署副

都統雅秦前何所據竟以撤兵啟報大將軍簡親王
簡親王何以竟不詳察即行具疏其令簡親王明白
回奏又

諭兵部將軍穆占大將軍簡親王總統師旅受將帥之
任宜求濟大事彼此和衷若爾各懷嫌隙恐悞疆場
嗣令務相輯睦爾部即行傳諭

敕大將軍康親王傑書速援海澄

海澄總兵官黃藍奏五月五日夜半海賊四路

攻海澄官兵力戰衆寡不敵致城外木柵礮臺俱陷賊復從高阜瞰城中火攻不絕臣以勢迫請援於將軍總督恐援兵稍遲則海澄難保

上諭總兵官黃藍死守孤城忠貞懋著大將軍康親王其速檄將軍賴塔拉哈達等赴援海澄密遺書副都統伯穆赫林總兵官黃藍等如有隙可乘即率滿漢官兵棄城突出來會漳州大軍

將軍穆占陳戰守機宜

上從之

穆占奏郴州等九州縣幅輳遼濶設有賊出犯
無兵可遣因檄駐守廣東南雄將軍舒恕分兵
馳赴郴州今逆賊逼永興而軍宜調江西提督
趙賴往守攸縣界和碩額駙華善將軍印即率
署前鋒統領薩克察巴圖魯滿兵總兵官趙應
奎標兵由安仁進發斷耒陽賊後路毀其浮橋
如不可毀則遣赴永興與副都統雅秦雅哈喇

額思赫等協同固守臣盡檄所部還郴州整兵
前取耒陽則逆賊自潰至於都統伊里布何故
戰沒俟嚴訊與戰官屬供詞成案以

聞

上諭特授穆占為將軍統率大兵由秦入楚自荊州啟
行以來凡兵將或攜或留及調遣守禦事宜無不如
奏允行即今破賊收疆亦皆穆占是賴此等調度俱
如所請至都統伊里布緣何戰沒事關重大穆占其

明白密奏

大將軍貝勒尚善奏舟師敗賊於洞庭

尚善等以滿漢官兵分布戰艦令將軍鄂爾等率之入湖是月初三日賊逼柳林嘴君山諸處我師奮擊敗之擒斬千餘并沈賊艘

己丑

命大將軍安親王岳樂發兵赴大將軍簡親王喇布軍

前援勦

時喇布以賊逼永興而茶陵攸縣諸處防兵已
經調援守禦力弱請濟師

上諭議政王等曰簡親王喇布自抵江西未能勦除逆
賊克復疆土而于失機將士復不嚴責軍狀及遣守
茶陵攸縣諸處已收復地方又不能鎮防屢以力單
奏請益兵凡所題奏率過其實此皆喇布庸劣不能
効力之故其俟事平旋師之日嚴加議處大將軍安
親王兵見駐守長沙無論護軍甲兵每佐領選一二

人遣赴簡親王軍前且大兵既鎮守茶陵攸縣安仁諸處則吉安又為內地吉安署副都統尼滿等之兵亦聽簡親王隨宜調用尋復

諭兵部長沙茶陵郴州地勢及逆賊情形久未知悉大將軍安親王將軍穆占大將軍簡親王各遣熟識情形具諳始末奏事傳旨不致遺悞者一人馳驛赴京安親王仍遣護衛雅圖偕來

壬辰授將軍穆占大將軍簡親王喇布用兵機宜

時逆賊以大隊侵永興犯我河外營前鋒統領碩岱護軍統領哈克三等禦之失利哈克三戰沒賊遂據我河外營環攻永興時簡親王告急于安親王令發每佐領兵二三人來援安親王遣夸蘭大塔爾拜畢里克率醴陵守兵每佐領一人有半馳往應援喇布具疏以

聞

上諭兵部覽大將軍簡親王等奏逆賊以大隊犯永興

有必死之形由我軍每佐領一二人或數百人所在
遣防兵勢太分以致失利將軍穆占大將軍簡親王
其速收可援之地所有防兵還之要害會合羣力大
創永興賊鋒期令蕩滅凡摧寇破賊必審己之力可
擊則擊之如賊衆我寡即宜調集諸路合為一軍壯
其聲勢以圖攻勦儻株守新復城池以一經駐鎮憚
于旋師遲留疑畏於大事殊無所濟爾部明白移文
速傳示穆占簡親王知之

甲午調兵援江西

上諭議政王等曰賊并力犯永興諸處江西不無可虞
頃據報副都統雅塔里提督石調聲總督李之芳等
部兵陸續抵福建見在兵數已不為少署副都統岳
爾多不必赴福建即率所部兵趨江西吉安至於陝
西滿漢官兵甚衆將軍阿密達同大將軍公圖海自
外藩蒙古外餘滿洲蒙古漢軍無論護軍甲士合每
佐領調四人量選大臣官員阿密達率往南昌仍佩

將軍印其原從護軍四十人并聽隨往總督帥顏保率其標兵亦往南昌漕運事務令總河靳輔攝理

命前鋒統領薩克察巴圖魯等援郴州大將軍簡親王喇布遣官兵運糧永興

喇布奏前鋒統領薩克察巴圖魯於本月十三日自安仁率師前赴永興賊於是夕渡河還據故營恐狡賊疑我虛作聲勢用偏師立營而以大隊潛赴郴州又臣等前得米百石已令運赴

永興以道路阻塞復行撤還

上諭逆賊如果併力郴州永興前鋒統領薩克察巴圖魯護軍統領拉賽等共議酌量留兵守城統率餘卒間道馳援簡親王隨所得糧米撥運官兵相續轉運速達永興

乙未

勅將軍穆占等勦禦柳永賊寇

穆占奏前鋒統領碩岱副都統託岱宜思考等

營壘被衝河之南岸失陷於賊退至郴州而碩
岱已赴永興俟嚴取護軍統領拉賽口供另行
奏聞碩岱等即宜拘禁但臣既已深入郴州兵
力甚單而碩岱復遠在永興是以未行逮繫統
候

裁奪目今賊之大隊及有名偽將皆併力郴州請就近
速發滿漢官兵守藍山嘉禾桂陽永寧諸處

上諭今逆賊既併力郴永將軍穆占可盡撤間地防兵

擊敗犯郴賊寇保固廣東江西勿致疎虞并令大將
軍安親王速遣兵赴大將軍簡親王軍至日簡親王
等大振軍威勦除郴州永興之賊更令廣東韶州總
兵官尚之瑛遣副將一員率樂昌綠旗兵二千速赴
郴州聽穆占隨宜調遣授和碩額駙華善將軍印馳
至永興總統鎮守至于署副都統多諾參贊軍務碩
岱等失利即宜速繫嚴加處分但因穆占調大臣官
兵所在分防致兵力單薄遂爾失機其悞事之罪穆

占及碩岱等俱不可辭碩岱等各暫留原任立功贖
罪復

諭穆占曰爾勿因永興兩次失利遂不計大事有裨與
否冒昧妄動亟宜鼓舞人心振揚軍勢以圖克濟果
能併力破寇前罪自當渙釋

勅大將軍康親王傑書等救海澄被困官兵

上諭兵部海澄官兵所關甚重非尋常比急宜奮力救
援其檄趣大將軍康親王將軍賴塔拉哈達等內外

夾攻務期拔出城內官兵既而報至大兵四路攻進
賊以火器拒戰我師退賊又用礮逼攻海澄

上諭傑書等曰頃聞海澄援師退朕心甚為被困官兵
憂之此非尋常事宜奮力急救使出切勿稍有疑難
滿漢官軍聞散人及廝役有能倡率衝敵直過潮溝
抵于海澄救出被困官兵者準克復上等府城例從
優議叙給以官職將軍以下將士即從前屢有失利
退縮之罪俱從寬宥不必顧戀城池但使被困官兵

得出即為克秦膚功也大將軍康親王將軍賴塔拉
哈達總督姚啓聖提督石調聲等稟行曉諭滿漢官
兵務期慰朕憂念

丙甲

命圖上永興茶陵諸處及岳州用兵形勢

上諭兵部將軍穆占大將軍簡親王所得永興茶陵等
九州縣之地我兵立營及賊壘所在令詳悉繪圖具
奏岳州水陸駐兵形勢并賊所立營亦令詹事宜昌

阿詳悉繪圖上之

丁酉

詔慰出征將士

上諭兵部朕御極以來孜孜圖治欲使天下治安庶物
豐裕人民富庶兵民樂業共享雍熙不意逆賊吳三
桂背恩叛逆擾亂地方數年遣發大兵所在征討勦
撫兼施次第蕩平止吳逆盤踞一方尚未授首以致
出征軍士披堅執銳衝冒鋒鏑晝夜偵探盛暑勞頓

且興師日久滿洲蒙古漢軍兵丁器械朽壞或有馬
斃借貸置辦者或年幼之人原得分給田畝而經營
器械馬匹廝役致多方稱貸種種疾苦深可憫惻但
因逆賊未滅不得已而用兵各處官軍其奮勇爭先
勦除逆賊底定疆土速奏膚功還京之時其一應借
貸俱著該部代還諸處調集之兵俱各還本汛內外
軍士咸令得所朕之勅旨昭如日月將示大信于天
下斷不食言至于從征官兵効績被傷猶堪軫恤勿

俟大兵齊到其未干軍律被傷官兵應得銀兩速察給其家爾部即傳示內外俾諭朕恤兵酬勞至意

臣謹按兵書有云用兵之法必先察吾士衆激吾勝氣乃可以擊敵焉是時因三楚秦粵諸路將帥逡巡未進曠日持久致出征官兵均被艱苦而滿兵猶感戴我

朝養育之恩專欲爲國効力每各自稱貸以備馬匹器械諸物辛勤更甚我

皇上洞鑒下情恐士卒或因勞瘁志氣稍隳爰

特頒諭旨慰勉各處官軍令其奮勇爭先速滅逆賊還
京之時一應借貸俱著該部代還諸處調集
之兵各還本汛內外軍士咸令得所于是將
士皆懽呼感激勇心奮發敵愾倍增未幾即
拔岳州下湖南而川粵黔滇以次蕩定矣此
皆由我

皇上深悉兵法鼓勵勝氣之所致也迨疆隅咸奠天下

承平令諸路官兵各還本汛量加叙賞後乃
優賜禁旅償其積負

命戶部動支帑金數百萬兩併將兵士私債悉與代還
恩綸始布之日閤城童叟莫不歡聲雷動讚頌

聖明是誠亘古未有之

大賚史冊罕見之

洪恩也豈獨酬六師之成勞直以固我

國家億萬年無疆之基業

大聖人謨謀深遠規為盛大洵迥出千古矣

戎戍

命總督董衛國增兵遣赴吉安

大將軍簡親王喇布奏署副都統尼滿啓臣云
萬安泰和諸處逆賊不時出沒吉安最為要地
而防兵甚少臣觀吉安泰和諸處正當廣東贛
州水陸之衝請調可緩之地綠旗官兵赴吉安
協守

上諭頃已調將軍阿密達總漕帥顏保率兵前赴江西
今簡親王既請遣發綠旗官兵宜令總督董衛國酌
量撥遣馳赴吉安與署副都統尼滿等協力固守至
于江西綠旗官兵屢經調赴湖南見在兵力亦屬單
弱董衛國可募有資力精銳兵五千人以備調遣

平定三逆方略卷三十八

欽定四庫全書

平定三逆方畧卷三十九

康熙十七年七月己亥朔調副都統馬思文率兵
赴福建

時安塘筆帖式報海澄長泰陷賊

上諭海澄長泰既陷賊必猖獗閩省大兵無幾宜就近
調發以資勦禦將軍華善所留江南京口漢軍兵四
百人及京口將軍王之鼎所屬漢軍兵六百人令副

都統馬思文率之馳赴福建聽大將軍康親王調遣
京口地方亦關重要宜發京師漢軍兵一千令副都
統關保率往協守至日聽將軍王之鼎統轄

又

諭康親王傑書等官兵失援海澄恐因之自沮將軍大
臣當時加鼓勵果能滅賊恢疆則前罪自釋仍予議
叙其通行曉示

尋傑書奏至言海澄糧盡六月初十日官兵委

城突出海澄遂陷將軍賴塔拉哈達等所統官兵甚衆卒不能解海澄之圍致虧損將士宜即從重擬罪但見在禦賊俟軍務稍暇另行察議臣既身任調遣之責罪亦難逭

上諭海澄何以不能救援其令將軍賴塔等明白具奏康親王俟事平日察議至於海澄突出官兵久被圍困勞瘁已甚該督撫其支取正賦錢糧辦馬匹鎧仗給之

命和碩額駙華善為將軍鎮永興

大將軍簡親王喇布奏逆賊吳三桂選偽將軍
著名者逼犯永興而身踞衡州窺伺間隙臣所
部守兵單弱不便分遣提督趙賴雖令來守攸
縣尚未即至請速發綠旗兵二三千為戰守備
上諭頃以吉安逼近茶陵諸處已遣發將士往守大將
軍安親王又分兵遣赴茶陵簡親王宜固守茶陵授
和碩額駙華善將軍印馳赴永興統兵鎮守俟穆占

進兵之日簡親王宜速發遊擊馬昇兵一千礮二十五具前往毋致有悞

辛丑

勅將軍莽依圖等遣兵援鬱林

將軍巡撫傅宏烈奏吳逆調各路賊兵數萬渡河與我兵對壘六月十日我兵失利退守鬱林屢請援師竟無應者今臣望舊標惠潮兵至合力齊舉庶可成功

上諭鬱林關係最重將軍莽依圖額楚總督金光祖速遣官兵馳往應援儻賊勢盛我兵難以拒守將軍傅宏烈都統勒貝等應退至要害之地會同莽依圖等協力守禦都統馬九玉行已兩月逗留不進不合宜檄令速赴梧州平南親王尚之信總督金光祖速備夫船以濟傅宏烈舊標惠潮官兵無悞前進

詔責將軍穆占

先是前鋒統領薩克察巴圖魯請援兵擊却永

興之賊穆占謂永興軍事已付大將軍簡親王
凡事宜請於王簡親王喇布以

聞

上諭防守江西全省及湖南茶陵永興諸處凡有勅旨
皆署穆占名於前簡親王名於後蓋倚任穆占實甚
初未分別汛守也今穆占因永興兩次失利輒思巧
脫檄稱永興為簡親王之地於往者屢次詔旨殊屬
違戾穆占簡親王自今以往毋得懷嫌互分彼此所

有閒地汎兵悉行撤回無論郴州永興遇逆賊來犯即大振兵力以期盪滅

甲辰

命署副都統岳爾多率兵仍赴福建副都統關保率兵赴江西

上諭議政王等曰據福建所報海賊劉國軒等取同安水陸犯泉州前大將軍簡親王奏永興諸處賊勢稍退已勅將軍穆占撤閒地之兵鎮防險要而大將軍

安親王所遣援師已抵攸縣岳州大兵復水陸齊舉
賊欲深入能不懼歸路阻絕耶向以永興警急江省
可虞因令署副都統岳爾多率師赴江西今閩中事
迫岳爾多仍率師赴福建并移文浙江督撫將軍速
各撥馬千匹給岳爾多兵俾兼程馳往副都統馬思
文自京率往漢軍兵四百人亦與岳爾多同行移文
大將軍康親王備夫船於浦城迎取大兵勿致有悞
將軍王之鼎標兵六百人不必要率往福建可仍留京

口見今所發漢軍兵一千令副都統關保率赴江西
南昌俟陝西所遣兵至江西視何處當用即協力從
事并移會將軍穆占大將軍簡親王知悉

勅將軍穆占等勦禦犯永興諸處賊兵

上諭兵部福建海逆猖獗事勢急迫因令前赴江西署
副都統岳爾多仍率師赴福建江西關係重大其傳
示將軍穆占大將軍簡親王等今前進擊賊尚非至
急惟擊却侵犯永興諸處逆賊俾不能進薄江西福

建乃為最要穆占等其同心詳酌力禦賊寇保固江西使萬無一虞

戊申

勅大將軍順承郡王勒爾錦遣兵赴岳州

大將軍貝勒尚善奏我兵既水陸攻岳請

勅順承郡王量留鎮兵於彝陵荊州諸處速撥每佐領兵各五人綠旗兵五千人馳赴岳州軍前

上諭擊破逆賊規定湖南在此一舉今逆賊大勢偏注

於廣西鬱林湖廣郴州永興諸處順承郡王等其勿以彼疆此界置之不肯務善為圖維期濟國事荆曩諸處守兵遺令裁足餘兵悉發岳州

召劉進忠等來京師

大將軍康親王傑書密奏討逆將軍劉進忠總兵官劉炎見在臣軍但彼等獲罪殊重深自疑懼今值調兵前進而山海醜類蜂起彼等益懷叵測殆不可定章下議政王等議言海逆犯漳

泉不可不速行撲勦將軍劉進忠總兵官劉炎
久歷海疆其於逆賊情偽地方形勢在所熟悉
應移文大將軍康親王令彼等馳驛來京臣等
詳詢明白再議具題

上從之

丙辰

詔責大將軍簡親王喇布等

將軍穆占奏臣屢啓大將軍簡親王請令和碩

額駙華善等援永興迄今未遣華善等既未嘗
往破浮橋又不赴永興宣調來代臣守郴州俾
臣往取耒陽或擊來犯之賊然在永興諸臣於
賊來攻時竟不拒截坐令三面受圍且永興所
有滿兵每佐領八名有餘綠旗兵復及三千未
嘗一戰

上諭先授和碩額駙華善為將軍署副都統多諾為參
贊勅令遣往永興何以至今不遣其於急要軍機貽

悞非淺賊寇情形本令不時報聞比來並無所報殊屬不合簡親王俱明白回奏華善可否往郴州穆占可否來永興簡親王與穆占詳議至於永興兵力不足拉賽等不行却賊之故簡親王嚴察以聞

詔釋幹都海等從軍効力

上諭議政王等曰原任副都統幹都海阿進泰署副都統碩塔參領克什布滿丕圖圖班賴色驍騎校札親筆帖式馬爾泰護軍校表哈護軍羅丹俱從寬免死

軍前効力幹都海阿進泰碩塔俱委夸蘭大與碩塔
同議處之員俱委署軍職札親馬爾泰表哈羅丹俱
為護軍並發將軍阿密達軍前効力幹都海等俟阿
密達至南昌釋出委用札親等四人即行釋出仍準
出征護軍例給賞啓行

丁巳

諭將軍莽依圖等隨宜進止

時將軍巡撫傅宏烈等自容縣退駐藤縣奏言

廣西事不可問梧州亦復可虞請遣大臣一員
令觀臣營進止並祈令都統馬九玉與臣合營
効力

上諭廣西軍務已委任將軍莽依圖額楚傳宏烈都統
勒貝副都統額赫訥等自宜殫心籌畫和衷協謀期
濟大事不必更遣大臣莽依圖等務相度機宜可進
則進否則暫守要地整飭軍馬待時而動其馬九玉
原令將軍等隨宜調遣不必合營

戊午

詔飭直省督撫提鎮覈實兵數

總督姚啓聖疏言設兵捍守本期有裨實用鎮將各官多以食餉兵丁充伴當書記軍牢等役至臨陣十不得七臣標亦有軍牢等役俱經全革另募入伍

上諭總督姚啓聖革退伊標軍牢等役俱經全革有裨勦禦可嘉直省綠旗兵丁經制額數專為防守汛地

征勦賊寇而設該管各官自宜實足兵數以資戰守
督撫提鎮等經制兵內如有充伴當書記軍牢以及
馬夫水夫等役悉行裁汰務足兵額儻仍不改陋習
因循踵行該督撫等糾劾從重治罪若督撫等徇庇
或為科道指叅或被旁人首發除妄行官員從重治
罪外督撫等亦按徇庇治罪決不輕貸其通行曉諭
復福建額兵設同安漳浦總兵官

總督姚啓聖奏閩省寇在門庭兵不給用應增

兵一萬八百人漳浦同安故有總兵官後同安
改設副將漳浦總兵官之兵改入海澄公標下
是以防禦維艱應仍設總兵官各一員疏入下
之兵部部議以大將軍康親王等曾請增閩省
綠旗兵一萬八百人未經允行況見議增督標
兵三千餘人而署副都統岳爾多已率滿兵馳
往如更增兵一萬八百人總兵官二員必重糜
糧餉應無庸議

上諭該督身在地方深悉情形是以題奏宜如所請增兵一萬八百人須募有資力精健者充補同安漳浦俱設總兵官總督姚啓聖巡撫吳興祚提督楊捷公同商酌推舉謀勇素著者來奏

勅將軍拉哈達等速援泉州

大將軍康親王傑書奏副都統雅塔里棄同安退入泉州賊遂直前圍泉州副都統吉勒塔布提督石調聲退至興化惠安復陷臣隨檄將軍

賴塔總督姚啓聖守漳州調將軍拉哈達速率
兵來援泉州

上諭海逆日以猖獗同安惠安相繼失陷泉州見被賊
圍速宜調兵救援可檄趣署副都統岳爾多疾馳以
往平南親王尚之信所遣副都統尚之璋廣東提督
侯襲爵等抵潮州日同總兵官馬三奇固守潮州著
靖南王耿精忠侍郎達都等自潮州率滿漢官兵馳
赴福建與拉哈達等協力剿除海逆以解泉州之圍

既而康親王傑書復奏閩省地方失陷所在道路梗塞甚屬堪虞惟望署副都統岳爾多統兵來至

上諭兵部岳爾多自出征以來初無寸効今率兵往復不倍道疾驅稽延時日殊屬不合其檄趣速進

詔許大將軍所分遣將軍得專奏軍機

上諭議政王等曰凡大將軍以印授參贊大臣充將軍分遣他所凡軍機事宜不必申報大將軍代題可直

行陳奏若大將軍所遣二將軍會於一所大將軍即
令一將軍為首取一將軍印還俾為參贊一切調度
俱聽大將軍節制

己未

詔增岳州兵

先是

上諭詹事宜昌阿曰我水陸大兵並進攻岳州今或宜
戰克或宜困取何時何日可以恢復其確探明白速

行奏聞至是宜昌阿奏今雖水陸圍岳州而九貴山
至今未獲駐兵故賊得往來此地以通樵採如
岳州不下長沙無船可用而荊州大兵亦不能
渡江宜固守長沙荊州調餘兵以困岳州俾內
外不通斷其樵採賊勢困窮則十月內外似可
克復然軍機朝夕有變今賊勢窮蹙衆心惶懼
如有機可乘即旦暮克取亦不可定

上諭岳州為湖南咽喉要地必此地恢復則長沙荊州

之兵始能前進大將軍順承郡王所部兵數不少攻
取岳州事關最要宜如大將軍貝勒尚善前疏所請
速遣滿漢兵馳赴岳州其陝西往江西之兵可勿往
江西遣赴岳州將至岳州時如永興圍解即留此兵
於岳州同順承郡王所遣兵併力進攻岳州儻永興
之圍未解則由岳州赴大將軍簡親王軍前河南安
慶俱近岳州河南巡撫董國興可遣標兵一千五百
人安徽巡撫徐國相遣標兵五百人令賢能官統領

俱赴岳州將軍阿密達抵南昌釋幹都海等亦率之
赴簡親王軍原護軍四十人俱令同往岳州此諸路
兵抵岳貝勒尚善量增其軍所有水陸官兵於九貴
山設立一營但有可克之機即進兵攻取

勅將軍穆占赴永興

穆占奏逆賊三面圍永興水陸道阻臣因復酌

遣護軍甲兵綠旗兵及火礮令副都統布舒庫
率之往會署副都統尼雅漢堅壁河南岸永興

內外一切軍機令與拉賽薩克察巴圖魯合謀而動但郴州諸處廣遠遼濶鎮守之兵諸遣江西贛州總兵官哲勒肯併其標下官兵速赴

臣

軍

上諭平定湖南勦除逆賊俱委任將軍穆占大將軍簡親王等穆占宜親赴永興撲滅賊衆頃者都統王國棟率兵往鎮宜章宜章與郴州相近總兵官哲勒肯不必遣往

庚申授尚之孝為宣義將軍遣赴江西

先是尚之信奏臣弟尚之孝向蒙授平南大將軍之職藩下鎮將曾經統領今與臣共居一城體統難施每每引嫌心不自安請調之孝赴京師別用

上允其來京至日給一品頂帶食正一品俸已而之孝上言臣詣

闕請罪分當誅戮過蒙寬宥臣願募兵三千赴王將軍

軍前勦賊報効

上諭尚之孝既請募兵効力以報國恩可授宣義將軍
暫駐南昌聽募兵三千俟兵數募足軍械完備赴大
將軍簡親王軍前征勦逆賊

大將軍貝勒尚善奏舟師敗賊於岳陽湖

偽將軍杜輝等乘船犯柳林嘴我舟師迎敵君
山扁山舟師亦來合擊賊敗走斬獲甚多沉其
賊船方進戰時夸蘭大薩爾海鈞輝船賊擲火

薩爾海之船被燬署護軍統領扎喇克圖以舟助戰救薩爾海及兵百餘人并奪賊船而還

上諭署護軍統領扎喇克圖助戰奪賊船可嘉事平議叙嗣後我舟進與賊戰有鄰近舟艦能助奪賊船者記名待敘其移知貝勒尚善俾通行傳諭

辛酉

勅尚之信遣兵守潮州

之信奏鬱林滿漢官兵今已退至容縣潮州事

勢可緩兼有靖南王耿精忠及滿洲大兵足以鎮守因撤原遣潮州副都統尚之璋還省城遇有緊急可隨宜應援

上諭項因海逆猖獗侵犯漳泉已調靖南王耿精忠侍郎達都率潮州兵往援今若撤還副都統尚之璋則潮州止餘總兵官馬三奇駐守宜令尚之信速趣提督侯襲爵前赴潮州并量發官兵以補之璋之缺同襲爵三奇協力固守

勅浙江總督李之芳等遣兵守福建延平

巡撫吳興祚奏延建邵汀四府皆有賊伏兵我各路守兵疊經調發遣往漳泉請令浙江督撫發標兵二三千人來延平固守要害

上諭海逆犯漳泉事在迫急浙江總督李之芳巡撫陳東直量留兵守浙江而於各營兵內酌便抽選二三千人遣往延平至浙江兵丁屢經調發福建恐致浙地兵力單薄該督可召募有資力壯健兵丁五千人

分隸各營

甲子授大將軍貝勒尚善等攻取方畧

時詹事宜昌阿所遣筆帖式馬爾賽還岳州瀕

行

上諭之曰我船甚多湖中諸將亦衆公溫齊副都統杭
奇德業立等似宜酌遣一員於陸路至若賊船大非
我比賊雖各路赴援諒皆小舟少有巨艦況船艘非
旦夕可成我沙船兵亦宜抽調陸地調時毋令賊覺

諸路調來綠旗之兵酌令屯九貴山或貝子章泰或
公溫齊副都統杭奇以一人駐守立營之時仍宜兼
顧三眼橋地方賊或遁走即宜進剿蓋兵貴神速也
貝勒等視賊得毋藐忽賊雖非我敵猶必慎為之防
至岳州一克即宜分兵往取湘陰長沙前雖有勅旨
命克復岳州之後即進取常德澧州今思深入常德
賊或襲吾後饋餉不易渡馬亦難總宜臨時相機而
動至於賊船僅四十餘我船甚多宜載火器於小舟

乘夜擾之勿使寧息近岳州安塘筆帖式報我兵奪賊一船復沉其船一宜昌阿身在彼地嗣後一切應報事宜可悉以奏聞

命兵部侍郎郭丕等按湖南軍事

遣侍郎郭丕員外郎舒恕赴湖南按問軍中事宜因

諭曰將軍穆占屢奏言大將軍簡親王援師不應機遣發致事不克濟簡親王何故不遣官兵其穆占前報逆賊全力偏注郴州果曾逼犯郴州否如未嘗來犯

則郴州永興之間相距甚近穆占何故不勦滅永興
逆賊以至若是此等事由可明白確察至地方形勢
永興前後兩戰及逆賊侵犯情形一併察明嚴取供
詞以奏今羣賊肆犯永興其郴州宜別委大臣量留
官兵鎮守穆占身率兵前赴永興爾等至彼或應調
穆占前赴永興或應仍留郴州其與穆占簡親王詳
確定議一面進發一面奏聞復令傳

諭穆占曰穆占不量地方緩急不遣重兵鎮守致賊犯

永興及請濟師又不迅遣精銳官兵并力而往我朝諸將遇敵雖兵力單弱亦不退縮必奮勇攻擊是以都統伊里布護軍統領哈克三等陷沒於陣夫為將者當以朝廷大事為念徒為身計獨留精兵自護軍機坐失職此之由況穆占陞辭時曾面諭凡有分遣必厚兵力頃永興兩次失利朕心深為縈慮蓋緣穆占不厚兵力不調發精銳之所致耳如近者大兵圍困長沙岳州豈不可使并力平濠拔杞肉薄而攻破

毀其城但朕心憫惻不忍官兵慘罹鋒鏑故令大隊
舟師並進其諭穆占知之

平定三逆方畧卷三十九